

[FOTO SHAHRINNAHAR LATIB/BH]



Ahmaz Azmey bersama sebahagian pelajar pada Program GIGvaganza-Empower ECER 2016: Fun Learning English Empower ECER Mahkota Pekan dan Kuantan di Universiti Malaysia Pahang (UMP), Gambang, semalam.

UMP, ECER bantu pelajar mantapkan bahasa Inggeris

➔ Program GIGvaganza-Empower 2016 kukuhkan tatabahasa

Oleh Shahrinnahar Latib
bhnews@bh.com.my

► Kuantan

Program GIGvaganza-Empower ECER 2016 mampu membantu pelajar terutama yang tinggal di luar bandar mengukuhkan tatabahasa dan mengubah persepsi bahawa Bahasa Inggeris sukar dipelajari.

Pengerusi Lembaga Pengarah UMP Advanced Education (UAE), Datuk Ahmad Azmey Abd Talib, berkata program kerjasama Majlis Pembangunan Wilayah Ekonomi Pantai Timur (ECERDC) dan Universiti Malaysia Pahang (UMP) itu dapat

membantu kerajaan membangunkan sosioekonomi rakyat dengan menawarkan khidmat kepakaran akademik.

"Peranan Pusat Bahasa Moden dan Sains Kemanusiaan UMP dalam program ini adalah untuk membantu masyarakat setempat khususnya pelajar sekolah melalui program berbentuk akademik.

Tawar khidmat pakar

"Program ini juga dapat meningkatkan kemahiran berbahasa contohnya Bahasa Inggeris dan dapat membantu pelajar terutama calon peperiksaan umum seperti Pentaksiran Tingkatan 3 (PT3) dan Sijil Pelajaran Malaysia (SPM)," katanya.

Beliau berkata demikian ketika menyampaikan ucapan pada Majlis Perasmian Penutup Program GIGvaganza-Empower ECER 2016: Fun Learning English Empower ECER Mahkota Pekan dan Kuantan di UMP Gambang, di sini, kelmarin.

Yang turut hadir, Pengurus Bahagian Pembangunan Modal

Insan ECERDC, Benji Johan Ibrahim; Ketua Program Jabatan Bahasa Moden, Pusat Bahasa Moden dan Sains Kemanusiaan UMP, Dr Noor Raha Mohd Radzuan dan Pengurus Besar Bahagian Pembangunan Perniagaan UAE, Zainal Bahari.

Sementara itu, Benji Johan berkata, program itu dianjurkan bagi memantapkan penguasaan tatabahasa pelajar sekolah melalui aktiviti interaktif dan menyeronokkan.

"Ia berasaskan aplikasi tatabahasa yang merentasi kurikulum serta berintegrasikan elemen kreativiti serta teknologi.

"Program bertujuan membolehkan pelajar mengaplikasi ilmu dipelajari dalam kehidupan harian," katanya.

Katanya, dengan itu, pihaknya berharap pelajar yang sudah menyertai program ini dapat menggunakan segala kemahiran yang mereka pelajari seperti kemahiran komunikasi, intrapersonal dan interpersonal.

Info

Program GIGvaganza-Empower 2016

➔ 360 pelajar PT3 dan SPM terabit dalam program
➔ Membabitkan sebanyak 6 buah sekolah di daerah Pekan dan Maran